



SURAT EDARAN UMT BILANGAN 4 TAHUN 2023

**Bantuan Khas Penghargaan Penjawat Awam dan Pesara Kerajaan Tahun
2023 di Universiti Malaysia Terengganu (UMT)**

TUJUAN

1. Surat edaran ini bertujuan memaklumkan mengenai pelaksanaan pemberian Bantuan Khas Penghargaan Penjawat Awam dan Pesara Kerajaan Tahun 2023 di Universiti Malaysia Terengganu (UMT).

LATAR BELAKANG

2. Jabatan Perkhidmatan Awam (JPA) Malaysia telah mengeluarkan Surat Edaran JPA.800-3/2/4 (33) bertarikh 1 Ogos 2023 mengenai Bantuan Khas Penghargaan Penjawat Awam dan Pesara Kerajaan Tahun 2023 untuk digunapakai di semua Perkhidmatan Awam Negeri, Pihak Berkuasa Berkanun dan Pihak Berkuasa Tempatan.
3. YAB Perdana Menteri melalui Majlis Peluncuran Ekonomi MADANI: Memperkasakan Rakyat telah mengumumkan bayaran Bantuan Khas Penghargaan (BKP) Penjawat Awam dan Pesara Kerajaan Tahun 2023 sebanyak RM300.00 iaitu kepada pegawai Perkhidmatan Awam Kumpulan Pengurusan dan Profesional serta Kumpulan Pelaksana Gred 56 dan ke bawah termasuk pegawai/kakitangan lantikan kontrak.
4. Di samping itu, BKP Penjawat Awam dan Pesara Kerajaan Tahun 2023 ini turut dipanjangkan kepada pesara kerajaan termasuk pesara berpencen, penerima pencen terbitan, pesara Skim Kumpulan Wang Simpanan Pekerja (KWSP), pesara bersara pilihan dan belum menerima pencen, veteran berpencen serta veteran tidak berpencen sebanyak RM200.00.

SULIT

PEGAWAI YANG LAYAK

5. Selaras dengan keputusan tersebut, kaedah pelaksanaan pembayaran BKP Penjawat Awam dan Pesara Kerajaan Tahun 2023 adalah seperti berikut:

5.1 Bayaran layak diberikan kepada :

- i. Pegawai Perkhidmatan Awam Kumpulan Pengurusan dan Profesional serta Kumpulan Pelaksana Gred 56¹ dan ke bawah yang masih berkhidmat pada 10 Ogos 2023. Pegawai Perkhidmatan Awam Kumpulan Pengurusan dan Profesional serta Kumpulan Pelaksana yang layak tersebut merupakan:
 - a. Pegawai lantikan tetap, sementara *Contract of Service (COS)*²;
 - b. Pegawai yang bercuti bergaji penuh;
 - c. Pegawai yang bercuti separuh gaji;
 - d. Pegawai yang bercuti tanpa gaji;
 - e. Pegawai yang dipinjamkan termasuk ke agensi yang diasingkan pengurusan saraannya. BKP Penjawat Awam dan Pesara Kerajaan Tahun 2023 ini akan dibayar oleh agensi yang menerima peminjaman pegawai.

- 5.2 Bagi pesara Kerajaan termasuk penerima pensyen terbitan di bawah undang-undang pensyen, pesara Skim Kumpulan Wang Simpanan Pekerja (KWSP) yang bersara daripada perkhidmatan awam apabila mencapai opsyen umur persaraan paksa (55/56/58/60 tahun) atau bersara Atas Sebab Kesihatan (ASK) pada atau sebelum 10 Ogos 2023 layak dibayar sebanyak RM200.00 oleh Jabatan Perkhidmatan Awam (JPA) manakala veteran berpencen dan tidak berpencen oleh Jabatan Hal Ehwal Veteran (JHEV).

¹ Pegawai di Gred 56 atau setara. Tidak termasuk pegawai yang sedang memegang di Gred Utama/Khas.

² Bagi pegawai di bawah *Contract for Service*, surat edaran berasingan akan dikeluarkan oleh Kementerian Kewangan.

SULIT

5.3 Pesara (rujuk para 5.2) dan veteran yang dilantik semula secara lantikan tetap, sementara serta COS dan masih berkhidmat pada 10 Ogos 2023 layak dibayar sebanyak RM300.00. Pembayaran sebanyak RM200.00 akan dibuat oleh JPA/JHEV dan bakinya sebanyak RM100.00 oleh jabatan di mana pegawai sedang berkhidmat.

5.4 Pegawai Perkhidmatan Awam Persekutuan yang meninggal dunia pada 10 Ogos 2023 layak diberikan BKP Tahun 2023 sebanyak RM300.00.

5.5 Pembayaran ini **tidak layak** diberikan kepada pegawai-pegawai berikut:

- i. pegawai dalam Kumpulan Pengurusan Tertinggi dan setaraf termasuk pegawai yang memangku, dipinjam/ tukar sementara dan penempatan khas ke Gred Jawatan Utama/ Gred Khas;
- ii. pegawai yang dikenakan hukuman tatatertib buang kerja atau turun pangkat dalam tempoh 1 Januari 2023 hingga 10 Ogos 2023;
- iii. pegawai yang ditamatkan perkhidmatan demi kepentingan awam dalam tempoh 1 Januari 2023 hingga 10 Ogos 2023;
- iv. pegawai yang meletak jawatan dalam tempoh 1 Januari 2023 hingga 10 Ogos 2023; dan
- v. pegawai berpencen yang melepaskan hak pencen kerana menyertai Badan Berkanun Yang Diasingkan Saraan (BBDS).

5.6 Pegawai yang ditahan kerja, digantung kerja atau surat pertuduhan telah dikeluarkan oleh Pihak Berkuasa Tatatertib (PBTT) akan **ditangguhkan** pemberian BKP Penjawat Awam dan Pesara Kerajaan Tahun 2023 ini. Pegawai hanya layak dibayar BKP Penjawat Awam dan Pesara Kerajaan Tahun 2023 setelah dibebaskan daripada pertuduhan tatatertib atau dikenakan hukuman selain buang kerja atau diturunkan pangkat oleh PBTT yang berkenaan.

SULIT

TARIKH PEMBAYARAN

6. BKP Penjawat Awam dan Pesara Kerajaan Tahun 2023 ini akan dibayar pada 10 Ogos 2023 dan menjadi tanggungan UMT di mana pegawai berkhidmat pada tarikh pembayaran.

TARIKH KUAT KUASA

7. Penerimaan pakai surat edaran ini adalah mengikut tarikh ianya diluluskan oleh pihak berkuasa Universiti.

Disediakan oleh:-

Jabatan Sumber Manusia
Pejabat Pendaftar
Universiti Malaysia Terengganu